



Khutba Jummah


HAZRAT MUHYI-UD-DIN AL-KHALIFATULLAH

Munir Ahmad Azim

05 Août 2016 ~
(01 Dhul-Qaddah 1437 AH)

(Résumé Khutba)

Après ki li fine salué tous so bane disciples (et tous bane musulmans) entier le monde avec la salutation de paix dans l'Islam, Hazrat Muhyi-ud-Din (atba) fine lire Tashahhud, Ta'uz, Surah Al Fatiha, et li fine ensuite cause lor le sujet de: « Zikrullah - Le Rappel d'Allah »:



Allaziina aamanuu wa tatma'innu quluubuhum bizikril-laah; alaa bizikril-laahi tatma'innul quluub.

« Bane ki gagne la foi et ki zot lécoeur trouve ene tranquillité kan zot pense à Allah. Eski c'est pas en pensant à Allah ki lécoeur trouve tranquillité? » (Ar-Rad 13: 29).

Zikrullah (Le Rappel d'Allah) c'est vraie nourriture de bane les cœurs. Le cœur, l'esprit et l'âme de l'homme épanouir avec *Zikrullah* et rétréci (et perdi complètement) sans *Zikrullah*. Li pas difficile pou faire *Zikrullah*. En effet, c'est ene devoir très simple, et récompense et signification de *Zikrullah* zot en vérité bien grand. Celui ki néglige ene telle pratique simple mais ki important et bien gratifiant (c'est-à-dire, ki apporte bocou bocou récompense et satisfaction), alor ene tel dimoune li pou en vérité ene dimoune bien malhéré. L'indifférence ki dimoune montrer envers *Zikrullah* li ene invitation ki li pé rodé pou amène ene calamité lor li-même.

Allah décrire dans Quran Shareef bane ki fine alle ziska délaisse le *Zikrullah* et ki fine mette sa ene côté ziska oublier complètement pou rappelle Allah (et pou ena la crainte d'Allah dans tout kitchose ki zot faire):

« Satan fine vine pli fort ki zot et fine faire zot oublier rappelle Allah. Zot fine vine partisans Satan. Mais n'est-ce pas partisans Satan ki pou dans la perte ? » (Al-Mujadila 58: 20).

Par conséquent, nous, bane musulmans, nous bizin faire zéffore pou reste dans *Zikr* (Souvenir) d'Allah (swt) arrive saki arrive, même si sa pé vine de plus en plus difficile kan nous pé consacré nous à nous bane activités mondaines. *Zikrullah* li ene z'arme puissant contre bane mauvais suggestions de Satan ki rode accapare nous lé cœurs doucement doucement et conduire nous pou trompe nous-même. Azordi zour, nous capave trouver ki même si la technologie li censé aide bane dimounes pou gagne plisse lé temps et ene meilleure qualité de vie, mais au lieu de sa, bane dimounes pé vine de plus en plus agité, triste, stressé et rempli avec traca. Sa c'est parski Satan pé gagne terrain lor zot, pé accapare zot, kot li détourne zot l'attention d'Allah (swt) et kot li induire zot dans erreur dans zot bane décisions ki zot prend.

Kan nous reste dans *Zikrullah*, sa faire nous gagne la crainte d'Allah (swt), kot li permette nous pou touzour mette en perspective bane kitchoses de la vie en ré-organisant bane priorités en conséquence de bane commandements d'Allah afin pou maintenir l'harmonie individuelle, sociale, ainsi ki l'harmonie au niveau de l'environnement. Par conséquent, bane mauvais actions zot pou anéanti par la sincérité du cœur afin pou recommande le bien et interdire le mal, et sa pou permette nous pou trouve la tranquillité du cœur. Allah conseille à So bane serviteurs comme suite:

« Travaille pou la vie future avec séki Allah fine donne toi. Pas oublier to part dans sa la vie ici là. Faire du bien, couma Allah fine faire pou toi. Pas cherche créer désordre lor la terre. Allah pas content bane ki faire désordre. » (Al-Qasas 28: 78).

Kan la langue reste frais kan li trempé dans *Zikr*, sa donne nous la capacité pou combatte également le désespoir, couma mo ti expliqué vendredi dernier. Le *Zikr* d'Allah touye le désespoir et ouvert lé cœur vers bane nouvo chemins de l'espoir et de confiance en Allah. En plus de sa, sa confiance en Allah là produire ene tranquillité ki renforce le serviteur d'Allah dans so la foi et so devoir, à la fois envers Allah et aussi envers bane dimounes. Nous bizin donc soumettre nous volonté à Allah (swt) seul et à personne d'autre. Nous ena sa croyance ferme là et nous garde nous l'espoir ki Allah pou occupe nous, peu importe saki arriver, et aussi longtemps ki nous faire zéffore pou reste dans bon chemin. De ce fait, alor ki nous admette nous bane limitations en tant ki êtres humains, mais néanmoins, nous guette vers l'avenir positivement, en laissant le reste à la sagesse d'Allah. Le désespoir li alor remplacé par confiance en Allah (swt) Li-même; Allah c'est Li-même ki en charge de tout; Li Celui ki possède tous bane meilleurs attributs; Celui ki Clairvoyant, Omniscient, Juste et Sage.

« Celui ki crainde Allah, Li pou donne li ene porte de sortie, et Li pou attribuer li des dons, kot li pas ti penser. Celui ki mette so confiance en Allah, Allah suffit pou li, parski Allah

atteinde toujours So but, et Allah donne à toute chose so proportion (nécessaire). » (At-Talaq 65: 3-4).

Par conséquent, en tant ki musulmans, nous bizin croire ki tout saki arrivé vine de So volonté (la volonté d'Allah) et ki Allah faire (ou décrète) nek saki bon pou nous. En tant ki musulmans, nous convaincu ki pour sakaine de nous bane problèmes, ena touzour ene solution, ene la porte sorti!

Allah rassure nous dans Quran Shareef :

« Vraiment à côté difficulté, ena ene facilité! Vraiment à côté difficulté, ena ene facilité! » (Ash-Sharh 94: 6-7).

En renfort à bane l'enseignements Quran, le Saint Prophète de l'Islam, Hazrat Muhammad (saws) fine également mette en évidence l'importance *Zikrullah* dans plusieurs de bane Hadiths. Ene de parmi so bane *Sahaba* (compagnons), Abu Moussa (ra) fine rapporté ki Rassoulloullah (saws) fine dire: « *Celui qui mazine so Rab (Maître) et kikaine ki pas mazine so Rab, zot couma ene vivant et ene mort respectivement.* » (Bukhari & Muslim).

Celui ki pratique le *Zikr* d'Allah fine comparé à ene dimoune vivant parski l'existence du *Ruh* (l'âme) li en fait le souvenir même d'Allah (swt), tandi ki celui ki garde li-même loin avec *Zikr* fine comparé à ene dimoune mort. D'ailleurs, Allah (swt) rappelle bane ki rappelle Li. Ene l'autre proche compagnon du Saint Prophète (saws), Abu Huraira (ra) fine rapporté ki le Messenger d'Allah (saws) fine dire: « *Allah (swt) dire: « Mo avec Mo serviteur kan Li rappelle Moi. Kan Li rappelle Moi dans so lécoeur, Mo rappelle li dans Moi, et si Li rappelle Moi dans ene l'assemblée, Mo mentionne li dans ene l'assemblée bien pli meilleure encore (c.à.d, celui de bane Anges).* » (Bukhari & Muslim).

D'autre part, pour bane ki satisfait avec zot-mêmes et ki possédé de côté matérielle, sa bane là faudé pas penser ki bane confort de bane dibiens matériels, la richesse et le luxe zot pas capave marché avec *Zikrullah*. Zot bizin garde à l'esprit ki bane telles possessions pareil zot aussi bane faveurs d'Allah (swt) ki Allah fine accorde l'homme pour ene létemps limité. Ainsi, bane ki livré zot dans le luxe faudé pas oublier pou faire le *Zikrullah*. Zot aussi zot bizin engage zot constamment dans le souvenir d'Allah (swt), kot zot bizin remercier Allah tout en profitant du confort de bane bienfaits ki Allah (swt) fine accorde zot, et zot bizin aussi zoine zot dans la cause d'Allah pour faire bane bons travaux, en dépensant ene partie de saki zot fine amassé comme fortune dans le chemin d'Allah. Sa genre de sacrifice financier pour la cause d'Allah, afin pou plaire Allah sa aussi ene forme de *Zikrullah*, parski sa dimoune là pé mazine Allah et au nom d'Allah pé consacré ene partie (ou la totalité) de so bane richesse dans le chemin d'Allah, pour bane travailles de la religion de l'Islam (*Deen-i-Islam*), pour aide encore plus pour le progrès de l'Islam.

Par conséquent, nous tous nous bizin adopter l'habitude pou nous mazine Allah (swt), que ce soit avec nous la langue, nous l'esprit et nous bane actions aussi souvent ki possible parski Mu'az Ibn Jabal (ra) fine rapporté ki le Messager d'Allah (saws) fine dire:

« *Bane dimounes Paradis pas pou regrette nannié, excepté ene sel kitchose (durant zot séjour lor la Terre) : Bane l'heure temps ki zot fine laisse passer et kot zot pas fine fer le Zikrullah (kot zot pas fine mazine Allah).* » (Tabarani, Baïhaqi).

Rappelle-zot ki sa type de regret là pas pou ressembler aucaine regret ki exister dans sa le monde ici-bas là, parski c'est ene telle regret ki pas pou cause aucaine préjudice, ni aucaine la peine. Chanceux sa bane dimounes ki, malgré ki zot gagne accès au Paradis zot ti pou content ki zot ti faire encore plisse *Zikr* Allah afin ki zot recevoir la chance pou accède à bane stages supérieurs du Paradis.

Ki Allah aide sakaine d'entre nous pou faire So *Zikr* (pou rappelle Li) dans bane façons ki pli digne de gloire afin ki Li touzour content et satisfait de nous, et ki Li rappelle nous et faire nous éloges pour nous bane actions et l'amour ki nous ena pour Li auprès de So bane anges, et tous So bane créatures ki trouve dans bane les ciels et lor la terre. *Ameen*. En vérité, nous priorité c'est Allah, pou rode Allah et gagne Allah comme nous récompense. Sa bizin vine nous vrai but dans la vie, arrive saki arrive. Ki Allah permette nous pou rapproche avec Li dans So *Godi* (lébra) et So l'amour. *Ameen, Soumma Ameen, Ya Rabbal Aalameen*.